

TATA IBADA FOR HARI MINGGU

BENTUK IV

Minggu, 27 Juni 2021

BASIAPI FOR MO BAIBADA

Tu baator ibada :

Dulu seblum ni dunia ada, Yesus tu ja bilang firman itu so ada. Dia itu da sama-sama deng Tuhan Allah, kong Dia itu no tu Tuhan Allah. Tu firman itu so ada sama-sama deng Tuhan Allah seblum ni dunia ada. Tu firman itu yang da kase hidop tu samua yang ada, deng Dia lei tu trang yang se trang tu manusia pe hati supaya bole tau tentang Tuhan Allah. Kong Dia itu yang samua suku bangsa mo semba. Mari jo torang badiri, torang manyanyi sama-sama:

“JAO-JAO TUHAN SO PILI PA TORANG”

Jao-jao Tuhan so pili pa torang, kong pangge pa torang samua
Yesus so kase torang pe hidop, for kemuliaan namaNya
Kase tu hidop kudus pa Tuhan, kong jangan ragu iko De pe mau
Dia mo beking torang sama deng Dia, hidop kudus nda bacela

Refr: Mari jo torang samua datang badekat, badekat deng Dia 2x

Dari Yesus torang ada keslamatan, dari Yesus torang ada sukacita
Dari Yesus torang ada kedamaian, Yesus beserta selamanya

PEMBUKAAN (*Jemaat badiri*)

P : Slamat pagi/siang/sore/malam, sudara-sudara

J : Slamat pagi/siang/sore/malam, sudara

P : Torang pe ibada ini, de pe tema: **Biar Jo Samua Suku Sembra Pa Dia**

Kong tu nas pembimbing yang ada de pe hubungan deng torang pe tema skarang ini da ambe di **Wahyu 7 : 9**, tu de pe bunyi bagini: “*Abis itu, kita lia ada klompo orang pe banya skali sampe nyanda dapa rekeng de pe jumla. Dorang itu dari samua fam, suku bangsa, bahasa deng bangsa. Dorang samua badiri di muka tahta deng di muka pa Anak Domba itu. Dorang da pake juba puti deng masing-masing da pegang daong palem.*”

P : Mari jo torang basombayang :Amin.

P : Mari jo torang manyanyi :

NNBT No. 3 : 1 “MARI TORANG PUJI ALLAH, HALELUYA”

Mari torang puji Allah, haleluya
pukul tifa, pukul gendang dengan merdu
Ya, hosana puji jo pa Dia segnap bangsa deng samua makhluk
Se tunjung Dia pe bae,
Se tunjung Dia pe mura hati
Mari torang puji deng sembra, puji sorak Haleluya

MANGAKU DOSA DENG MINTA AMPUNG PA TUHAN ALLAH (*Jemaat dudu*)

P : Jemaat yang Tuhan sayang, skarang ini torang mo babaca Alkitab deng mo renungkan itu. Mar seblum itu, mari jo torang ambe waktu skarang ini for priksa tu torang pe diri apa torang masih ja ikotu Tuhan Allah pe kata-kata tu da tulis di Alkitab ato so nyanda. Yesus bilang, ”Ngoni musti sayang pa Tuhan, tu ngoni sayang pa Dia lebe dari samua yang ngoni sayang, kong beking samua tu Dia da suru.”

Itu no tu hukum yang penting deng yang pertama. Kong tu hukum yang kadua tu sama deng itu, “Ngoni musti sayang pa orang laeng sama deng ngoni sayang pa ngoni pe diri sandiri.’ Dua atoran ini no tu jadi dasar dari samua atoran yang ada di kitab Taurat deng nabi-nabi pe ajaran.” (Matius 22 : 37 - 40)

- J** : Torang mangaku kalu torang banya kali beking tu jaha yang torang nimau mo beking.
Deng torang lei banya kali nyanda beking tu bae yang musti torang beking.
- P** : So lantaran itu, mari jo torang datang pa Tuhan Allah deng hati yang nyanda sompong kong torang mangaku tu torang pe dosa-dosa pa Dia.
- Torang basombayang : Amin
- P** : Ya, Tuhan dengar akang tu torang pe sombayang!
- P** : Ya, Tuhan kase ampung akang!
- P+J** : Amin
- P** : **Mari jo torang manyanyi :**

“KASIH YANG SEMPURNA”

Kasih yang sempurna samua, ta trima dari Dia
Bukang karna kita pe bae, cuma karna Tuhan pe sayang ini
Dia pulihkan torang, kong layakkan for kita mo bapangge Bapa
Refr. Dia kase yang ta minta, waktu ta cari pasti mo dapa
Kita toki tu pintu kong Dia mo buka, lantaran Yesus Bapa yang kekal
Dia nda mo se biar, kita bajalang cuma sasandiri
Dia slalu mo jaga pa torang samua lantaran Yesus Bapa yang kekal

- P** : “*Tuhan itu, Tuhan Allah yang suka ja bakase ampung, kase tunjung tu Dia pe rasa kasiang, kase tunjung De pe rasa sayang, kase tunjung De pe rasa sabar deng lei De pe sayang pa torang nyanda mo abis-abis.*” (**Nehemia 9 : 17b**)
- J** : So itu, mari jo torang puji tu TUHAN pe nama!
- P+J** : Haleluya, Haleluya, Haleluya (*kase manyanyi*)
- P** : Puji jo pa Tuhan deng lawang jo tu dosa sampe slama-lamanya. Amin

SOMBAYANG MO BABACA ALKITAB DENG KOTBA (*Jemaat dudu*)

- P** : Firman Tuhan itu ada kuasa dari Tuhan Allah yang se slamat dari hukuman dosa tu tiap orang yang percaya. Itu for samua orang, for samua suku bangsa. Lewat tu Firman Tuhan itu, Tuhan Allah so se tunjung tu Dia pe cara for beking torang jadi butul di muka pa Dia. Mari jo torang buka torang pe hati for belajar lei tu Firman Tuhan.
- P** : Mari jo torang basombayang Amin
- P** : Mari jo torang babaca Alkitab **1 Raja-Raja 3 : 16 - 28**
- P** : **KOTBA**

PERSEMBAHAN (*Jemaat dudu deng/ato bajalang*)

- P** : Mari jo torang bawa tu torang pe persembahan for Tuhan
- P+J** : Mari jo torang manyanyi : **NNBT No. 15 : 1 “HEI SAMUA UMAT TUHAN”**
- Hei samua umat Tuhan, kase persembahan
Sbagai rasa trima kase for Tuhan pe berkat
Tu ngoni pe persembahan pasti dapa berkat
Kong slalu bilang makase for Tuhan pe berkat

“TORANG PUJI PA TUHAN”

Tiap jam deng tiap waktu Tuhan jaga pa torang,
Tiap jam deng tiap waktu Tuhan sayang pa torang
Tiap jam deng tiap waktu Tuhan piara pa torang,
Tiap jam tiap waktu Tuhan slalu ada deng torang
Refr: Mari torang puji pa Tuhan, mari torang semba pa Tuhan
Karna cinta kasih yang Tuhan kase for torang samua
Mari torang puji pa Tuhan, mari torang semba pa Tuhan,
Karna cuma Dia Tuhan yang pantas for torang puji

SOMBAYANG FOR TU PERSEMBAHAN (*Satu orang syamas*)

SOMBAYANG FOR SAMUA (*Jemaat dudu*)

P : Mari jo torang basombayang:

- Basombayang bilang makase pa Tuhan
- Basombayang for tiap orang pe komitmen waktu renungkan tu Tuhan pe Firman
- Basombayang for orang laeng

P+J : Sombayang Bapa Kami ...

Torang pe Bapa yang ada di sorga, torang minta supaya samua orang hormat tu Bapa pe nama, lantaran Bapa itu kudus. Bapa, datang jo Berkuasa s'bagai Raja. Kong samua Bapa pe mau mo jadi di bumi sama deng tu ada jadi di sorga. Kase akang pa torang makanan yang cukup for ni hari. Kong kase ampung akang tu torang pe sala, sama deng torang kase ampung pa orang yang da beking sala pa torang. Kong jang kase biar torang tagoda beking tu jaha mar kase lapas akang pa torang dari tu kuasa jaha, soalnya Bapa tu Berkuasa sbagai Raja, Bapa yang punya tu kuasa, deng Bapa lei yang luar biasa sampe slama-lamanya. Amin.

NYANYIAN TERAKHIR (*Jemaat badiri*)

P : Mari jo torang manyanyi:

“API INJIL“

Tuhan punya maksut for torang pe dotu-dotu
Tu waktu dorang da trima Api Injil
Skarang dorang so nyanda ada,
yang tinggal Cuma pesan for anak cucu samua skarang ini
Biar api Injil trus manyala, oh manyala pa torang pe hati
Deng biar jo de pe cahaya, oh tapancar jo trus dari GMIM
So dari dulu, sampe Tuhan Yesus bale kembali

TERAKHIR (*Jemaat badiri*)

P : Sudara-sudara tarukira jo bae-bae tu Rasul Paulus pe nasehat ini:

Roma 16 : 25 - 27 “*Puji jo pa Tuhan! Dia itu yang mampu beking ngoni pe percaya jadi kuat lantaran ngoni so dengar tu Kabar Bae tentang Yesus Kristus yang kita ja setau pa orang-orang. Tu Kabar Bae itu dari dulu orang blum tau. Mar skarang ini Tuhan Allah so se tunjung itu pa manusia. Tu kabar bae itu, Tuhan Allah so se tau pa nabi-nabi dulu kong Dia suru dorang tulis itu supaya percaya deng iko pa Kristus. Tuhan Allah itu slalu ada sampe slama-lamanya. Puji jo pa Tuhan Allah, Dia Tuhan yang slalu tau mana tu bae. Torang puji deng hormat trus pa Tuhan Allah sampe slama-lamanya lantaran apa yang Yesus Kristus so beking. Amin.*”

P : Kase akang salam jo pa (bole mo bilang orang-orang yang da saki, so tua, deng laeng-laeng.)

P : Kong trima jo tu TUHAN Allah pe berkat :

Kita minta pa Tuhan Yesus Kristus se tunjung tu Dia pe bae pa ngoni, kong Tuhan Allah pe sayang deng deng Roh Kudus slalu ada sama-sama deng ngoni samua.

P + J : Amin....Amin...Amin

Saat Teduh

